

Dithero tsa Tirelano mo Kutlwanong

Thero ka Sontaga wa bofelo morago ga moletlo wa Epifania, e le ka 29. 01. 2012/10/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 54/61

2. Thapelo: Morena, Jesu Keresete, re a leboga, gonne o itshenoletse mo baporofeting, le mo baapostolong ba gago, wa ba senolela kgalalelo ya gago, fa o le Motlhanka wa Modimo yo o sikareng maleo a lefatshe, le Morwa Motho yo o ntseng mo kgalalelong ya ga Rraago. A o ko o re thuse gore le rona re bone kgalalelo e ya gago, re nne re lebogele thata e kgolo, le bopelothomogi jo bogolo jwa gago jwa go re kabolola ditsebe gore re go utlwe, jwa go re budulolela matlho gore re go bone, jwa go re bulela legodimo gore re pholosiwe, re ye re nne mo kgalalelong ya gago mmogo le wena le Rraago, le Mowa o o Boitshepo, re nne ba gago tota. Morena, re a go leboga. Amen.

3. Epistolo ka fa thulaganyong ya 2 e kwadilwe mo go 2 Bakorinthe 4:6-10;

Efangele ka fa thulaganyong ya 1 e kwadilwe mo go Matheo 17:1-9.

4.

A go ipolelwe tumelo ya bokeresete!

5. Sefela sa 80/83

6. Thapelo ya mmadi wa thero.

7. **Epistolo** ka fa thulaganyong ya 4 e ntšha e kwadilwe mo

Tshenolong 1:9-18, e re: "Nna Johane, morwa-Rraalona, yo o tlhakanetseng le lona pitlagano le puso le boitshoko mo go Jesu, ke ne ke le mo setlhakatlhakeng se se bidiwang Patemose ka ntlha ya Lefoko la Modimo le ka ntlha ya go supa ka ga Jesu. Ke ne ka tsenwa ke Mowa ka Letsatsi la Morena, ka utlwa lentswe le legolo kwa morago ga me, e kete la phala, le re: 'Se o se bonang, o se kwale mo lokwalong, o lo romele kwa diphutheng tse di supang, kwa Efeso le Semerina le Peregamo le Thiatira le Saredise le Filatefia le Laodikea.' Jaanong ka retologa gore ke bone lentswe le le buang le nna; fa ke retologa, ka bona ditlomo tsa dipone tsa gouta di supa; mo gare ga ditlomo tsa dipone ka bona mongwe yo o tshwanang le Morwa-Motho, a apere seaparo se se fitlhang kwa dinaong, a itlamile sehuba ka moitlamo wa gouta; tlhogo ya gagwe le moriri di le ditshweu jaaka boboa jo bosweu le jaaka semathana; matlho a gagwe a ntse jaaka kgabo ya molelo; dinao tsa gagwe di ntse jaaka kgotlho e khibidu, e e besitsweng mo leisong; lentswe la gagwe le ntse jaaka kgwaso ya metsi a le mantsi. O ne a tshotse dinaledi di supa ka seatla se se jang, mo molomong wa gagwe go dule tšhaka e e bogale, e e magale mabedi; sefatlhego sa gagwe se le jaaka letsatsi, fa le phatsima ka thata ya lone. E rile ke mmona, ka wela fa dinaong tsa gagwe jaaka moswi; mme a mpaya seatla se se jang a re: 'O se ka wa boifa; ke nna wa ntlha le wa bofelo le yo o tshelang; ke ne ke sule, mme ke tshela ka bosakhutleng; ke tshotse dilotlele tsa loso le tsa felo ga baswi (tsa molete wa molelo).'" Amen.

8. Thero: Barategi mo Moreneng wa rona Jesu Keresete, kajeno ka Sontaga wa bofelo morago ga moletlo wa Epifania re gakgamala ka go gakgamala tota sešwa. Re a gopodiwa gore Jesu Keresete Morena le Morepholosi o ne a itshenolela ka go bowa-bowa mo baporofeting ba Testamente e kgologolo, le mo baapostolong ba Testamente e ntšhwa, a ba senolela kgalalelo ya gagwe. Jesaya o ne a mmona a ntse mo kgalalelong ya gagwe teng mo tempeleng. Ka Efangele ya Sontaga wa kajeno re utlwa gore Jesu o itshenoletse mo barutweng ba gagwe boPetro, le Johane le Jakobo mo kgalalelong ya gagwe koo mo thabeng, fa Jesu a ne a ntse a tsamaya mono mo lefatsheng. Ka Lefoko la thero ya kajeno re utlwa gore Jesu o ne a itshenolela mo go Johane morutwa wa gagwe mo setlhakatlhakeng sa Patemose. Ke se se amang pelo ya motho tota, fa re utlwa ka Lefoko la kajeno gore Johane moapostolo e ne e le legolegwa mo setlhakatlhakeng sa kwa Patemose, e le legolegwa ka ntlha ya Lefoko la Modimo le ka ntlha ya tshupo ya ga Jesu. Ke gore ka sebaka sele bagolo ba lefatshe ba ne ba sa rate gore Efangele ya ga Jesu e rerwe, mme barutwa ba ga Jesu ba ne ba sa ka ke ba didimala ka yona, ba tswela go e rera, le go e ruta, ba re: Ba tshwanetse go utlwa Modimo bogolo go batho. Morena wa bone o ba laotse gore ba e rere. Ka ntlha ya moo Johane o ne a tshwarwa, a iswa mo setlhakatlhakeng sa kwa Patemose. Morena Jesu o ne a sa mo tlogele fela mo kgolegong ya gagwe. Nyaya, a itshenolela mo go ene mo kgalalelong ya gagwe, a tiisa gore morutwa wa gagwe a se ka a boifa, mme a tswela mo tirong. O ne a sa kgone go rerela batho ba gagwe. Ka moo Morena o mo laotse gore a ba kwalele se a se bonyeng, le se a se utlwileng. Ka tsela eo re a bona gore Morena wa rona Jesu ga a thibelwe, le e seng ke diketane tsa dikgolegelo, le e seng ke letlhoo la batho. O tswela fela go dira tiro ya gagwe, batho ba utlwe ka ga gagwe, batho ba bilediwe mo go ene, batho ba itse Morena le Mopholosi wa bone. Go a dirafala, fa batho ba utlwa ka ga tse baapostolo ba ga Jesu

1. ba di bonyeng;

2. le ka ga tse ba di utlwileng.

1. Johane a bona **yo o tshwanang le Morwa-Motho**. Mafoko ao a re: "Jaanong ka retologa gore ke bone lentswe le le buang le nna; fa ke retologa, ka bona ditlomo tsa dipone tsa gouta di supa; mo gare ga ditlomo tsa dipone ka bona mongwe yo o tshwanang le Morwa-Motho, a apere seaparo se se fitlhang kwa dinaong, a itlamile sehuba ka moitlamo wa gouta; tlhogo ya gagwe le moriri di le ditshweu jaaka boboa jo bosweu le jaaka semathana; matlho a gagwe a ntse jaaka kgabo ya molelo; dinao tsa gagwe di ntse jaaka kgotlho e khibidu, e e besitsweng mo leisong; lentswe la gagwe le ntse jaaka kgwaso ya metsi a le mantsi. O ne a tshotse dinaledi di supa ka seatla se se jang, mo molomong wa gagwe go dule tšhaka e e bogale, e e magale mabedi; sefatlhego sa gagwe se le jaaka letsatsi, fa le phatsima ka thata ya lone. E rile ke mmona, ka wela fa dinaong tsa gagwe jaaka moswi; mme a mpaya seatla se se jang." Johane a bona yo o tshwanang le Morwa-Motho a apere tse di phatsimang tsotlhe tseo. Ga re kgone go thalosa tsotlhe tse Johane a di bonyeng. Re gopola fela gore Jesu a ntse a tsamaya mo lefatsheng o ne a ipitsa ka leina leo la Morwa-Motho. Ke gore o ne a rata go gopotsa Johane gore a itse tota gore ene yo o neng a tsamaya le 29. 01. 2012 / ka Sontaga wa bofelo morago ga moletlo wa Epifania

bone, a ise a bapolelwe mo sefapaanong, e sa ntse e le ene yo o itshenolelang mo go ene mo setlhakatlhakeng sa Patemose, kwa Johane a neng a le legolegwa teng ka ntlha ya Lefoko la Modimo le ka ntlha ya go supa ka ga Jesu. Jesu o sa ntse a dirafatsa tsholofetso ya gagwe ya gore o tla nna le bone barutwa ba gagwe go ya mo bokhutlong jwa lefatshe, o sa ntse a le mo go ene, ga a mo tlogele. Ke ene Kgosi e e ntseng mo kgalalelong ya yona. Ke re: Johane o ne a gopola gore ba ne ba bona Morwa-Motho, fa e le Morwa Modimo, jaaka a kwadile mo Efangeleng ya gagwe, a re: "Ra bona kgalalelo ya gagwe, e le kgalalelo e e lebanyeng yo o tsetsweng a le esi, e tswa mo go Rara, a tletse bopelotlhomogi le boammaaruri." Boammaaruri joo Johane moapostolo o bo tiisa le ka mafoko a lokwalo lwa ntlha lwa gagwe, a re: "Re lo anegela se se neng se le teng go tloga tshimologong, se re se utlwileng, se re se bonyeng ka matlho a rona, se re se lebileng, se diatla tsa rona di se fophotseng, e bong sa Lefoko la botshelo - mme botshelo bo bonetse, re bile re bo bonye; re a supa, re lo begela botshelo jo bo sa khutleng, jo bo neng bo le fa go Rara, mme bo re bonatshegetse - Se re se bonyeng, ra se utlwa, le lona re a se lo rerela gore le lona lo nne le kopano le rona; mme kana kabelano ya rona ke ya go kopana le Rara le Jesu Keresete." Mafoko otlhe ao a tiisa maikaelelo a mantle a gore re itse Morena wa rona, le Mopholosi wa rona gore ke mang ene, o re baakanyeditse pholoso ka botlalo. Re itse Morena, Morepholosi ka go utlwa ka tse di bonyweng ke moapostolo Johane, le baapostolo ba bangwe.

2. E bile re itse Morena Morepholosi Jesu Keresete **ka go utlwa ka ga tse baporofeti le baapostolo ba di utlwileng**. Mo lefokong la thero ya kajeno re utlwa se Johane a se utlwileng, o kwala, a re: "E rile ke mmona, ka wela fa dinaong tsa gagwe jaaka moswi; mme a mpaya seatla se se jang a re: 'O se ka wa boifa; ke nna wa ntlha le wa bofelo le yo o tshelang; ke ne ke sule, mme ke tshela ka bosakhutleng; ke tshotse dilotlele tsa loso le tsa felo ga baswi (tsa molete wa molelo).'" Jesu Keresete Morena Morepholosi o bolelela Johane motlhanka wa gagwe gore ga a na go boifa. Ene ke wa ntlha le wa bofelo. Tsotlhe di simolotswe ke ene, tsotlhe di tla khutlisiwa ke ene. Tsotlhe di mo seatleng sa gagwe, le tsona tse di dirafetseng ka ene Johane, fa a ne a tshwarwa, a iswa mo setlhakatlhakeng sa Patemose. Johane a ntshiwa mo tirong, a bona phatlha ya go tsamaelwa ke Morena wa gagwe sešwa, a mmona sešwa. A a se ka a boifa, a gomotsege, a itumele le mo kgolegong ya gagwe. A itse gore Mopholosi wa gagwe yo o tshelang o sa ntse a le teng, ga a mo tlogela, ga a nke a mo tlogela, e seng ka gope, o tla nna le ene le koo mo setlhakatlhakeng sa Patemose. Johane o utlwa le se sengwe, e le se segolo, o gopodiwa ka loso lwa Morena Mopholosi wa gagwe Jesu. O bolelelwa gore ene yo o buang nae ke yo o kileng a swa, a swela mo sefapaanong kwa Golegota, a swela rona batho ba merafe yotlhe, ba dipaka tsotlhe gore re gololwe ka madi a gagwe mo maleong. Ene a swela mo sefapaanong gore e nne Kwana ya Modimo e e sikarang maleo a lefatshe, batho botlhe ba itshekisiwe mo maleong otlhe ka madi a gagwe. Mme loso ga lo bue lefoko la bofelo. Lefoko le Johane a le utlwang le tswelela le bua ka ga tsogo ya Morena Morepholosi Jesu Keresete, le re: "mme ke tshela ka bosakhutleng." Jesu o tsogile mo baswing ka letsatsi la boraro, a fenywa loso, le bosula jotlhe, a nyeletsa loso, a baya botshelo le bosasweng mo leseding ka Efangele, ka Efangele e e buang mo Lefokong la kajeno ka ga dilotlele tsa loso le tsa molete wa molelo. Jesu o re tswalela loso le molete wa molelo. Rona ba re leng ba gagwe ga re tlhole ra ya teng, mme re ya mo botshelong jo bo sa khutleng, ka Morena Morepholosi Jesu Keresete a tshotse le selotlele sa legodimo gore a re bulele manno a mantle a re a baakanyeditsweng ke ene mo legodimong. Re itse gore ya re a sena go tsoga mo baswing a iponatsa mo barutweng ba gagwe, a ba raya a re: "'A kagiso e nne le lona! Ke a lo roma, jaaka Rara a nthomile.' Ya re a sena go bua jalo, a ba budulela, a ba raya a re: 'Amogelang Mowa o o Boitshepo! Ba lo ba itshwarelang dibe tsa bone ba di itshwaretse; mme ba lo ba balelang dibe tsa bone ba di baletswe.'" Ka moo go buiwa mo Kategisimeng ya kereke ya Lutere ka ga tirelo ya dikopelo e e leng "thata ya kereke e Keresete o e neileng kereke ya gagwe mo lefatsheng go itshwarela baikwatlhahi dibe tsa bone, mme ba ba sa ikwatlhaeng bona go gana go ba itshwarela, go ya ba be ba itkwatlhaye." Ke se Johane a se utlwileng sešwa koo mo setlhakatlhakeng sa Patemose. A gopodiwa gore tiro e e simolotsweng ke Morena ga e ise e fele, le fa ene Johane ka esi a tshwerwe, e le legolegwa ka ntlha ya tiro e ntle eo ya Efangele ya ga Keresete.

Fela jalo le mo go rona tiro ya Morena Morepholosi Jesu Keresete ga e ise e fele, e sa ntse e dirwa kwa tse di bonyweng ke baapostolo ba gagwe, le tse di utlwileng ke bone di sa ntseng di rerelwa teng. Kwa tse di bonyweng, le tse di utlwileng ke bone di rerelwang teng, tiro ya Morena e tswelela pele. Teng batho ba tla itse Mopholosi wa bone, ba dumele mo go ene, ba amogelwe ke ene, ba rongwe ke ene gore le bone ba ye ba rerele ba bangwe tse di bonyweng le tse di utlwileng ke baapostolo jaaka ene Johane mo setlhakatlhakeng sa kwa Patemose, gore le ba bangwe bao ba di utlwe, ba bone Jesu ka tumelo, ba pholoswe ke ene. Fela jalo tiro ya gagwe e tla nna e dirwa, go ya Jesu a bowe ka letsatsi la bofelo mo kgalalelong ya gagwe gore a atlhole batshedi le baswi. Amen.

9. Thapelo: Morena Jesu Keresete, re a leboga, re lebogela tiro ya gago. A o ko o se lape, le e seng kamamoso, o nne o e dire ka metlha, palo ya baitlhaolelwi ba gago e tlale, batho ba bone kgalalelo ya gago, ba dumele mo go wena, ba itse gore o Morena le Mopholosi wa bone. Morena, o re utlwele botlhoko, le fa e le ka nako efe, le fa e le mo felong gofe. Morena, o re tlhomogepe pelo, o re fe kagiso ya gago. Amen. Thapelo ya Morena: Rara wa rona yo o mo legodimong...

10. Sefela sa 247/257

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 1994/2006/ 2011

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.